

АКАФИСТ СВЯТЫМ НОВОМУЧЕНИКАМ СЫКТЫВКАРСКИМ И КОМИ-ЗЫРЯНСКИМ

Кондак 1

Взбранная дружино воинства духовнаго, величающе скорби, узы и страдания ваша, со благоговением взирающе на подвиги и терпение святых, с любовью зовем вам: Радуйтесь, святити мученицы Сыктывкарстии и Коми-Зырянстии, за ны Христу молящиися.

Икос 1

Ангели, зряще, како гнев праведный Божий постиже землю Русскую и вся языцы ея от края и до края, како новое иго богоборческое тщится изгладити самое имя Христово из памяти человеческия, попирая олтари и предавая лютой смерти пастырей и овец Христовых, скорбяху о роде христианстем, от врага теснимем. Мы же, зряще таковая во всех пределах бывшая земли Сыктывкарския и Воркутинския, но и ведуще, яко ничтоже успеха нечестивии противу людей Божиих, зовем вси:

Радуйтесь, вернии страдалцы, в терпении подвиг совершившии; радуйтесь, лютость вражию посрамившии.

Радуйтесь, святителие, венцы своя мученическим бисером украсившии; радуйтесь, пастырие, верность свою всех Владыце явившии.

Радуйтесь, монаси, крепость адамантову врагом противуставившии; радуйтесь, отрекшиися мира и плоть ради Христа презревшии.

Радуйтесь, инокини благия, скорби велия любовь к Жениху растворившии; радуйтесь, святые жены, на Северной Голгофе просиявшии.

Радуйтесь, святити мученицы Сыктывкарстии и Коми-Зырянстии, за ны Христу молящиися.

Кондак 2

Видяще тяжкая страдания верных, яже во узилищах, во изгнании претерпеша, зрим в сем промысл Божий о людех Своих: яко злато, в горниле искушено, отребляется от всякия нечистоты, тако Господь искуси верных Своих, да паче сияют во Царствии Небеснем и да благодарно вопиют Вседержителю: Аллилуйя.

Икос 2

Разуме князь века сего: колико воздвизашася слугами его Голгофы многи народу православному, толико уязвляша и попираша главу его доблии воины Царя Небеснаго. Темже и мы, взирающе на подвиги их, взываем сице:

Радуйтесь, ратоборцы преславнии; радуйтесь, победившии полки чуждих.

Радуйтесь, нищету и наготу добре претерпевшии; радуйтесь, поношения и биения ни во что же вменившии.

Радуйтесь, болезни смертныя кротко подъявшии; радуйтесь, даже до крове за Христа пострадавшии.

Радуйтесь, любовь Христову на ближних излившии; радуйтесь, оледеневшая сердца их верою воспламенившии.

Радуйтесь, святити мученицы Сыктывкарстии и Коми-Зырянстии, за ны Христу молящиися.

Кондак 3

Сила Вышняго укрепи избранныя Его не убояться убивающих тело, души же не могущих убити, и яко бисером драгим украшены явишася земли Сыктывкарская и Коми-Зырянская

подвиги исповедников и мучеников Христовых, весь цвет земли Русския в себе собравшия. Лучшие от сынов и дочерей за Христа добре zde подвизашася, и мучителей конечно посрамивше, вопиют ныне Богу: Аллилуйя.

Икос 3

Имущи от Бога талант веры православныя, земля Русская обьюроде, в небрежение предадеса талант сей, в поношение и поругание вменишася светильники Господни; людие века сего возлюбиша паче тьму греховную, неже свет Святыи, обаче соблюл есть Господь остаток Себе, праведныя Своя, имже воспоем:

Радуйтеса, светом Христовым в безумнем мире сиявшии; радуйтеса, благоуханием молитв места скаредная облагоухавшии.

Радуйтеса, «соль земли» миру явившии; радуйтеса, свидетельством истины лжу богоборцев упразднившии.

Радуйтеса, о безумии мучителей скорбевшии; радуйтеса, о прощении их Бога молившии.

Радуйтеса, безбоязненно веру пред гонители исповедавшии; радуйтеса, и самой смерти в лице дерзновенно смотревшии.

Радуйтеса, святии мученицы Сыктывкарстии и Коми-Зырянстии, за ны Христу молящиися.

Кондак 4

Бурю злобы воздвиже враг невидимый на людей Божиих, изгоняя верных из градов великих в селения малая и дальняя; но свет ваш, святителие и пастырие Христовы, в изгнании сущии, и теплота сердец ваших не можаху укрытися от народа православнаго, истаявающаго гладом духовным посреде безбожныя мглы, жаждущаго пети Богу: Аллилуйя.

Икос 4

Слышав Господь вопли чад Своих, о укреплении молящих, взыскупя пользы их, дабы не оскудела вера овец Его, не имущих пастырей в годину лютую, послал есть им единаго от ученик Своих, архиерея Своего Германа, града Вязники епископа, да наставляеми святым житием его, вопиют таковая:

Радуйся, святителю, многоскорбный путь подъявый: радуйся, многолетняя изгнания претерпевый.

Радуйся, яко в веси Кочпонстей последнее пристанище обрел еси; радуйся, яко абие изгнании правды ради и зыряне вернии к любви твоей устремишася.

Радуйся, яко пением велелепным в церкви Пресвятыя Богородицы Владычицу мира славил еси; радуйся, яко и инех тому с любовию научал еси.

Радуйся, оплоте крепкий всем чадом и присным твоим; радуйся, свете теплый всем страждущим.

Радуйтеса, святии мученицы Сыктывкарстии и Коми-Зырянстии, за ны Христу молящиися.

Кондак 5

Боготечней звезде подобяся, приведен бысть, святителю Германе, промыслом Божиим в землю Зырянскую, и ту наставляше чад своих, в скорбех и обстояниях сущих: «Станем теснее ко Господу, тогда будем ближе друг ко другу, и никогда же прервано будет единство сие вопиющих Богу: Аллилуйя».

Икос 5

Видев, священномучениче Германе, тяжкая страдания людей православных в соблюдении общих, во изгнании голодом гибнущих, горце уязвлялся еси сердцем о них, и аще что могий, в помощь им творил еси, паче же словом утешал еси, яко вся страдания сия, со благодарением носимая, приведут непреложно ко Владыце Христу; темже зряще милосердие и любовь твою, вопием ти:

Радуйся, кротостию сатанинскую злобу покрывавый; радуйся, с отцовскою нежностию ближним душевныя раны врачевавый.

Радуйся, учения святых отец верный последователю; радуйся, всем любящим тебе святой наставниче.

Радуйся, яко велия дарования твоя единому Богу посвятил еси; радуйся, яко и живот твой за Христа положил еси.

Радуйся, несокрушимую крепость духа явивый; радуйся, Властителю душ наших и единому блага Источнику верно послуживый.

Радуйтесь, святити мученицы Сыктывкарстии и Коми-Зырянстии, за ны Христу молящиися.

Кондак 6

Проповедницы вернии явишася священницы Христовы святых заповедей Его, и за слово сие, яко пшеница зрелая, пожати быша серпом нечестивых, яко пшеница Божия в житницы Его, идеже ныне в веселии воспевают Богу: Аллилуйя.

Икос 6

Возсияша подвизи ваши, пастырие земли Зырянския, Димитрие, Григорие и Николае: рыкаху нечестивии, вас обличающе, яко звери дивии, терзающе и предающе на смерть неповинныя; мы же воспеваем доблим страдальцем таковая:

Радуйся, Димитрие, пастырю усть-немския церкви Спасския, первый во священницех зырянских от безбожных пострадавый; радуйся, за слово обличения дел беззаконных огнем устреленный.

Радуйся, славне иерею Григорие, в Селибе подвизавыйся; радуйся, в Богоявленстей церкви паству верности Христу научавый.

Радуйся, дерзновенною проповедию вооружавыйся; радуйся, церкви селибския верный защитниче.

Радуйся, честный иерею Николае, аныбския и донския паствы учителю; радуйся, ревностный юных душ наставниче.

Радуйтесь, святити мученицы Сыктывкарстии и Коми-Зырянстии, за ны Христу молящиися.

Кондак 7

Хотящим врагом церковь Христову и самое имя христианское на земли потребити, никакоже возмогоша: омывающихся кровью мучеников, очищающихся страданиями верных своих, возсияваше Церковь Божия в чистоте и доброте велией, и мужие инии небоязненно священный сан приимаху, да воспоят Владыце всяческих: Аллилуйя.

Икос 7

Новии людие, не токмо от роду священническа, любовию Божию уязвленнии, возставаху за оскверненныя олтари и веру святую, отметающесе лжи богоборческа и последующе за Христом на Голгофу; темже слышат от нас таковая:

Радуйся, Стефане, земледелателю и воине, посем же в Сыктывкаре Крестовоздвиженския церкви ревностный священниче; радуйся, архиерея Германа верный почитателю.
Радуйся, Михаиле, важгортския Воскресенския церкви чтец благоговейный; радуйся, ныне на небесех Бога прославляяй.

Радуйся, Евфимие, в Выльгорте церкви Сретенския ради потрудивыйся; радуйся, о сохранении и благолепии дома Божия даже до крове ревновавый.

Радуйся, Павле, безбожнныя лжи отвративыйся, кочпонския Казанския церкви богомолец усердный.

Радуйтесь, святити мученицы Сыктывкарстии и Коми-Зырянстии, за ны Христу молящиися.

Кондак 8

Странни явишася праведницы Божии людем омраченным, предпочетшим тленная блага любви Христове, еяже ничтоже есть сладчайше. Вы же, святити Божии, души своя положивши за Господа своего, вечная блага стяжавши, в райских обителях ныне воспеваете Христу Жизнодавцу: Аллилуйя.

Икос 8

Вси вернии священницы Христовы познавше, яко пришла есть година праведнаго гнева Божия на землю Русскую, уготовишася явити веру свою и терпение святых. Совершающе небоязненно служение свое и паству свою окормляюще, подьяша крест свой и до конца понесоша; темже, добрии отцы наши, слышите от нас похвалы сия:

Радуйся, Павле Усть-Вымский и Ибский, протоиерею честнейший; радуйся, отче монахолюбивый, иноком во изгнании пристанище устроивый.

Радуйся, православие твердо сохранивый; радуйся, обновление Церкви лживое обличавый.

Радуйся, Ибская похвало, иерею Николае ревностнейший; радуйся, безумию тиранов противоборче неколебимый.

Радуйся, Иоанне, в Керчоме Иоанно-Предтеченския церкви паству правой вере научавый; радуйся, долг свой священнический добре исполнивый.

Радуйтесь, святити мученицы Сыктывкарстии и Коми-Зырянстии, за ны Христу молящиися.

Кондак 9

Всякая испытанья тяжкая претерпе Невеста Христова, Церковь Божия, пройде сквозе огонь и воду, велия унижения, да очистится от всякия скверны, и со дерзновением, сияющая, предстанет своему возлюбленному Жениху, вопиючи Ему в веселии: Аллилуйя.

Икос 9

Ветия многовещаннии не возмогут превзойти немногоченая пастырей словеса, проповедающих о правде Божии и кровию своею запечатлевающих верность свою; не можаше гонителей лютость зверская заградити уста их; темже и мы, взирающе на крестный подвиг их, воспоем с любовию таковая:

Радуйся, Всеволоде, семуковския Никольския церкви иерею; радуйся, твердо в православии стояти селян наставивый.

Радуйся, Иоанне, во многих церквах потрудивыйся; радуйся, в Мошьюге в церкви Собора Пресвятыя Богородицы служение свое скончавый.

Радуйся, Палладие, гамския Сретенския церкви пастырю благоговейный; радуйся, на ниве церковней делатель усерднейший.

Радуйтесь, иереи Божии вернии; радуйтесь, в годину лютую небоязненно слово Божие возвещавшии.

Радуйтесь, святии мученицы Сыктывкарстии и Коми-Зырянстии, за ны Христу молящиися.

Кондак 10

Спасти хотя заблуждшия овцы Своя, воздвиже Господь верных Своих и на подвиги их укрепи, и сии, презревше мир и вся суетствия его, в поношение миру бывше, любовию и терпением попраша вся ухищрения вражия, и победную песнь воспеша Всемиловитому Спасителю душ наших: Аллилуйя.

Икос 10

Стена есть Пресвятая Богородица всем девство ради Христа хранящим и в монашеском звании подвизающимся; Ею ограждаеми, сугубо монаси подвизашася, да зело честни будут Подвигоположнику Христу, яко агнцы с радостию течаху на заколение, да пред лице Божие явятся. Сего ради с любовию воззовем к ним тако:

Радуйся, Платоне, иеромонаше изряднейший, во ульяновстем Троице-Стефановем монастыри с братиею подвизавыйся; радуйся, по игумене Амвросии, в узы заключением, монастыря настоятелю.

Радуйся, с братиею обители в Северодвинский стан работный, жилою железною огражденный, нуждею приведенный; радуйся, тяжкая страдания тамо добре претерпевый. Радуйся, посем часовския Спасския церкви священноиноче; радуйся, прихожаном образе верности православию.

Радуйся, Мелетие, обители Троице-Стефановы казначею; радуйся, и среди мира служение иерейское не оставивый.

Радуйтесь, святии мученицы Сыктывкарстии и Коми-Зырянстии, за ны Христу молящиися.

Кондак 11

Пение всякое не довольно есть изобразити, како и немощное естество женское противуста мучителем, како девы, жены и старицы посрамиша гордыню превознесенную, немолчно воспевающа Богу: Аллилуйя.

Икос 11

Светоприемныя свечи явишася инокини и жены мирския, горящия верою и любовию ко Христу Спасителю, со дерзновением начата попирати главу змиеву, во уметы вмещающа вся страхования и ярость его; тем же воззовем к ним сицевая:

Радуйся, инокине честная Елисавето, в кылтовстем Крестовоздвиженстем монастыри возраставшая; радуйся, по упразднении обители твоей в выльгортстей Сретенстей церкви послушание чтицы исправлявшая.

Радуйся, со дерзновением безбожную власть обличавшая; радуйся, силу духа пред мучители показавшая.

Радуйтесь, инокини, в мире гонимы бывшия; радуйтесь, обеты своя пред Богом соблюдшия.

Радуйтесь, безвестныя подвижницы, Богу же знаемыя; радуйтесь, мученицы безкровныя и жизнь за Христа положившия.

Радуйтесь, святии мученицы Сыктывкарстии и Коми-Зырянстии, за ны Христу молящиися.

Кондак 12

Благодать сугубую восхоте Господь даровати Русской Церкви: да явит свою верность Владыце не токмо во дни благоденствия, но и во дни гонений, якоже рече святыи исповедник, патриарх Всероссийский Тихон. Желаша нечестивии пролияти кровь святых аки воду, но паче наполняшеся Царствие Божие новыми святыми мученики и исповедники Христовыми, воспевающими Богу: Аллилуйя.

Икос 12

Поюще велии сонм святых мучеников, иже востаха в земли Зырянстей северней и кровьми своими явишася пред Богом жертва красная за безумие рода своего, людей своих, да и ти, милостию Божиею просвещени, взирающе на подвиг их, обратятся ко Господу, ублажаем вас сице:

Радуйтесь, очищение огненное подъявшии; радуйтесь, в покой Христов путем узким вшедшии.

Радуйтесь, посреде волков аки агнцы закалаеми бывшии; радуйтесь, подвигом добрым Христу угодившии.

Радуйтесь, жизни своя за имя Христово положившии; радуйтесь, честь сугубую от Царя славы восприявшии.

Радуйтесь, не бояться лютои мучителей нас научающия; радуйтесь, на всякий час ко исповеданию Христа готови быти нас наставляющия.

Радуйтесь, святии мученицы Сыктывкарстии и Коми-Зырянстии, за ны Христу молящиися.

Кондак 13

О, святии доблии новомученицы и исповедницы Сыктывкарстии и Коми-Зырянстии, добре подвиг совершившии и веру соблюдшии! Ныне предстояще престолу Царя царствующих и Господа господствующих и с лики святых веселящеся, молитесь о нас Христа Бога, да прегрешений оставление подаст душам нашим и велию милость, да спасаеми молитвами вашими радостно возопием Богу: Аллилуйя.

(Сей кондак чтем трижды, затем икос 1 и кондак 1)

Молитва

О, святая дружино новомучеников и исповедников, в Севернем краи подвизавшиися, землю Сыктывкарскую и Коми-Зырянскую кровьми своими освятившии и Христу Богу зело угодившии! Яко имуще велие дерзновение ко Спасу, молитесь милостиваго Бога, да прегрешений оставление подаст душам нашим. Молим вас, ходатайствуйте за нас, грешных и немощных и ленивых, да простит Он наше нерадение о своем спасении, да укрепит и вразумит, како нам жити в годину тяжкую, грядущую на вселенную.

Вемы бо, яко по грехом нашим достойни есмы праведнаго гнева Божия, во еже сожещи нас и осудити на муки вечныя, но молим вас, новомученицы и исповедницы Коми-Зырянстии, да будете нам помощницы и наставницы, егда нынешнии богоненавистницы уставят и нас, аможе стояете нозе ваши, идеже вы свой подвиг совершите и спасение улучите. Много бо может молитва праведнаго поспешествуема, тако да вашими молитвами и молитвами Пречистыя Владычицы нашея Богородицы и Приснодевы Марии вся добре претерпим за Христа, да Христа приобрящем, подвизающеся, аще Ему изволится, даже до крове, да спасение улучивше вашими святыми молитвами, радостно воспоем с вами и со всеми святыми, во обителех небесных, Отца и Сына и Святаго Духа, Троицу Единосущную и Нераздельную, ныне и присно и во веки веков. Аминь.